



JAKOBA ERREKONDO

Guk merezi ditugu, guk, bizkarrekoak!

Usurbildarro "arroa" ezizena jarri zigunak, ezagutzen gintuen, bai, alajainena! Uraparretan jarraitzen dugu, munduaren zilborraren erdiko txuloa bagina...

Lehenengo igandeko Sagardo Egunaz ari naiz. Egun bakar batean inguruko sagardozaleenak gera, inork baino gehiago dakigu sagardoaz, guk adina edaten duenik ez da, Usurbil sagardoaren Bihotza... Zakurraren putza!

Hona panorama, ez ona: urte guztian sagardorik ez da edaten. Hobeak direlakoan hor darabilzkigu, zanga-zanga, txakolina, ardoa, garagardoa... itxurakeriak jango gaitu. Tabernatan, jatetxetan etxetan sagardo aukerarik ez dago, askotan edateko modukoa ez dena ere bai eta behar bezelako tenperaturan zerbitzatzen badizute, gaitzerdi!

Udala ere ez dabil habil. Usurbilgo identitatearen adierazle nabarmenena da sagardoa, errioarekin batera. Datorkigun zerbitzuen gizartean Usurbilen etorkizuneko garapenaren oinarri beharko lukeenak, lotsagorritu egiten ditu, agidanean, gure politikoak. Ausardia ere exkaxa. 2.001 urtean udalaren enkarguz Artzabal baserrian Sagardoaren Museoa eraikitze eta kudeatzeko proiektua egin zuen honelako lanetan zaildutako eta eskarmentu sonatuko Bartzelonako enpresa batek. Hautsa artean hor egongo da nonbait, galdu ez bada.

Artzabal baserri barrokoa da; Bizkarre, Sariaaundi eta Ibarrolaaundi etab. Dolare-baserri gotikoen ondorengo belaunaldikoa. Artzabal bere baitan dolare barroko bat izateko eraiki zuten. Honexegatik kokatzen zen Museoren proiektua bertan. Sagardo Egunaren Lagunak elkartean eskuratua du, garai harrez gero, bertan kokatzeko dolare barroko original bat (300-400 urtekoa). Baina udalean ausardia falta. Hau bezalako, kulturen oinarritutako garapen eta zerbitzu proiektu bat burutzeko ausardia falta. Antigualeko garapen ereduak dituzte gure politikoei: fabrikak eta etxeak. Ondo antigualekoak! Eta garapen eredu berriak antolatze eta ausardia falta. Ausardi falta eta alperkeria, dagoenean gozo... Ausardi falta eta adikzio bat: porlana. Gure politikariek eskuarte porlanezko obra galantiek ez badute, ezer ez dutela egiten iruditzen zaie.

Usurbildarron nortasuna, izaera garatzea ahalbideratzen duten kultura, lurrarekiko lotura, baserria eta bere ondare osoa hutsaren hurrengo da urteak joan eta urteak etorri euroak milioika gastatzen dituen gure udalean.

Politikarien zai egon gabe badator, dagoenerako 25. Sagardo Eguna. Itxurakeria hutsalak utzi eta ea denon artean geurea den, geu garen, edari honen inguruan egitarau polit eta erakargarri bat osatzeko gai garen. Sagardoa geu geraldako.

Ainhua Azpiroz - Aitor Landaluze - Jakoba Errekondo - Luis Aranalde - Nerea Zinkunegi - Idoia Torregarai

Ika-mika !

Bi urte eskubide zibil eta politikorik gabe

Zenbaitek esango du: "hara, orain ere lelo bera, ederra ematen dute!" Ba bai, lelo bera gauzak aldatu ez direlako. Bi urte bete berri dira ia 1.200 usurbildarren ahotsa eta erabaki ahalmena ukatu zitzaigunetik. Bi urte dagozkigun eskubide zibil eta politikoak sistematikoki urratuak direla. Bi urte Usurbilgo sei zinegotzi "legalak" estatuak ezarritako lege zantzaileaz aprobetxatzen ari direla. Horietatik bi (PSOE eta PPkoa) erabateko adostasunarekin eta beste lau, berriz, (2 EAKo eta 2 PNVko) desadostasuna hitzez agertuz baina, ekintzez, beste horrenbeste egiten, hau da, ehunka usurbildar baztertzen. Hori bai, eskubideak ukatu baina betebeharrak mantenduz. Gure botoak, nonbait, ez dute balio baina zergetako ematen dugun dirua -beraiek nahi dutena egite-

ko erabiltzen dutena-, hori gure obligazioa da!

Halere, bi urte hauek, hainbat gauza oso agerian utzi dituzte: ezkertiar eta abertzaleok urteetan aldarrikatu dugun bezala, gure herriaren eskubideen aitortze eta euskal herritarren borondatearen errespetutik soilik konponduko dela mendeetan luzatzen ari den gatazka.

Bide horretan, eta askotan ikusi den bezala, herritik sortu eta herrian errotutako eskubideen aldarrikapen eta proiektu politikoak, ezin dira dekretu eta lege atzeritarren bidez, egun batetik bestera desagerarazi, batez ere, proiektu horretan sinesten dugunok bere alde ekiten dugulako. Bere garaian esan genuen ez zigutela mendira zokoratu, nola edo hala hor jarraituko genuela, gu ere herritarrak garelako eta legeak lege, legi-

timitate osoa dugulako gure ideien eta herri-ereduaren alde aritzeko.

Euskal Herriak, bi estatuekin duen gatazkaren konponbidearen aldeko adierazpenak nagusi diren egun hauetan, guztion ahotan da herriaren hitza errespetatzetik etorriko dela konponbidea. Baina asmo hauek guztiak gauzatzeko bidean, ausardia politikoa ezinbesteko osagaia da. Eta honek, udaleko egoera antidemokratikoari aurre egiteko beharrek zirikusi zuzena du.

Horregatik guri lapurtutako kargutan jarraitzen dutenei berehala dimititu dezatela eta LOREG-aren 182.2 artikulua bidez, herri zilegitasunez dagokionari kargua itzultzea exijitzen diegu. Borondate politikoa behar da bakarrik, ez hitz hutsalak.

Usurbilgo Herri Lan